

Алты боксшы алтынға таласады

Таиланд астанасы Бангкок қаласында 22 жасқа дейінгілер арасында бокстан өтіп жатқан Азия чемпионатында еліміздің намысын қорғап жүрген алты боксшы финалға шықты. Ақтық сында шымкенттік Махмуд пен Абзал да алтын жүлдеге таласатын болады.

Әрбір кездесуінде талассыз жеңіске жетіп отырған Махмуд Сабырхан 57 келіге дейінгі салмақта филиппиндік Джеричо Акайлармен финалдың жолдамасын сарапқа салды. Махмуд екінші раундта қарсыласын нокадаунға жіберіп, айқын басымдылықпен жеңді. Төрешілер есебі – 5:0. М.Сабырхан соңғы бөсекеде таиландтық Саравут Суктетпен алтын медаль үшін таласады. Финалға шыққан тағы бір боксшымыз Санжар Тәшкенбай 48 келіге дейінгі салмақта таиландтық Наттхонг Тхуамчаронмен жұдырықтасты. Санжар қарсыласын екінші раундта нокадаунға жіберіп, айқын басымды-

лықпен ұтты. Төрешілер шешімі – 5:0. Тағы бір қазақстандық Нұрсұлтан Алтынбек 54 келіге дейінгі салмақта қырғызстандық Ислам Торобаевпен рингке шықты. Қазылар бірауыздан жеңісті Нұрсұлтанға берді. Н.Алтынбек финалда филиппиндік Флинт Джарамен алтын жүлде үшін таласады. Сондай-ақ Абзал Серік 67 келіге дейінгі салмақта камбоджалық Пенх Вантхунгпен жұдырықтасып, бірінші және үшінші раундта нокадаунға жіберді. Төрешілер есебі – 5:0. Жастар арасында әлем чемпионы Сабыржан Аққалықов 71 келіге дейінгі салмақта тәжікстандық Довуд Махкамовтан айласын асырды. Диас Молжігітов (75 кг) жартылай финалдық кездесуін сәтті өткізді. Ол қытайлық Аиликути Кахаерді қазылардың бірауыздан шешімінен тізе бүктірді. Сонымен, ақтық сын Санжар Тәшкенбай – Шодиржон Меликузиев (Өзбекстан), Нұрсұлтан Алтынбек – Флинт Джара (Филиппин), Махмуд Сабырхан – Саравут Суктет (Таиланд), Абзал



Серік – Бехзод Хамидов (Өзбекстан), Сабыржан Аққалықов – Нурислом Исмоилов (Өзбекстан), Диас Молжігітов – Алохон Абдуллаев (Өзбекстан) арасында өтеді.

Ал Талғат Сырымбетов 60 келіге дейінгі салмақта қола жүлдені қанағат тұтты. Ол жартылай финалда таиландтық Пхутханет Родсукпен жұдырықтасып, бірінші раундта нокадаунға жібергенімен, жалпы есепте төрешілер шешімімен

қарсыласына жол берді. Сондай-ақ Мұхаммедсабыр Базарбайұлы 63,5 келіге дейінгі салмақта қола жүлдегер атанды. Төрешілер бұл жекпе-жекте моңғолиялық Тулга Оюнбаатар жеңді деп тапты – 3:2. Ерасыл Жакпеков 80 келіге дейінгі салмақта өзбекстандық Джасурбек Юлдошевпен жұдырықтасып, оны екінші раундта нокадаунға жібергенімен, төрешілер шешімімен жеңіліп қалды. Сөйтіп ол қола жүлдені қанағат тұтты.

Сондай-ақ 92 келіге дейінгі салмақта рингке шыққан Ерхат Бекзат өзбекстандық Нусратбек Тохировке есе жіберді – 0:5. Аса ауыр салмақта Аманат Сабырғали тағы бір өзбекстандық Джохонгир Зокировпен шеберлік байқасты. Екінші раундта Аманат дәл соққы алып, рефери есеп ашты. Ақыры төрешілердің бірауыздан шешімімен жеңіс өзбекстандық боксшының еншісінде кетті. Осылайша, боксшыларымыздың үшеуі өзбекстандықтардан ұтылып қалды. Жалпы финалға шыққан спортшылар саны бойынша он боксшымен Өзбекстан көш бастап тұр. Екінші орында Қазақстан, ал үшінші орындағы Таиланд құрамасы сапында үш былғары қолғап шебері алтын медаль үшін сайысқа түседі. Ал Филиппин мен Қытайда екі, Моңғолия, Индонезия және Камбоджа құрамалары бір-бірден боксшысын финалға қосады.

Азия чемпионатының финалдық кездесулері бүгін, яғни 25 және 26 қаңтар күндері өтеді.

Ұлттық спорттың үздіктері марапатталды

Жуырда Түркістан облысының ұлттық спорт саласы бойынша үздіктер марапатталды. «Тұран тұғыры» тақырыбында өткен жиында еліміздің ұлттық спортының жанажырылары бас қосты. Жалпы 20 номинация бойынша үздіктер анықталды.



Еліміз бойынша көш бастаған Түркістан облысының ұлттық спорт саласындағы үздіктердің мерейін көтеруді мақсат тұтқан бұл дәстүрлі іс-шарада мықтылардың еңбегі бағаланды. Жыл қорытындысы іспетті өткен «Тұран тұғыры» іс-шарасы екінші рет ұйымдастырылып отыр. Түркістан облысының ұлттық спорт құрамасы халықаралық, республикалық, облыстық жарыстарда және жаппай көкпардан өзгелерге дес бермей келеді. Сонымен қатар, аударыспақ, тоғызқұмалақ, асық ату мен күсбегіліктен де құралақан емес. Қазақ күресі, теңге ілу, бөйге, жамбы ату бөсекелерінде топ жарып, көптің көзіне түскен саңлақтар салтанатты жиында марапат

төрінен көрінді. Командалық көкпардан «Жылдың үздік шабандозы» иегері Абылайхан Нышанбеков пен «Жылдың үздік көкпар командасы» - жасөспірімдер арасындағы облыстың «Тұран» командасының қанжығасына бұйырды. Ал «Жылдың үздік аударыспақ ойыншысы» Дарын Өткелбайға, «Жылдың

үздік аударыспақ командасы» номинациясы жастар құрама командасына берілді. Осы орайда, талантымен талайларды таңғалдырған Бәйдібек Сабыров «Жыл жеңімпазы» атағына ие болды. Ұлтымыздың ұлылығын дәріптеп келе жатқан Әсел Далиева тоғызқұмалақтан «Үздік тоғызқұмалақ ойыншысы» атанса, «Жылдың үздік күсбегісі» номинациясы Жомарт Кеуеновке табыс етілді. Бұл жеңістердің артында білікті бапкерлердің қажырлы еңбектері бар екендігі даусыз. Бұл ретте, асық атудан «Жылдың үздік жаттықтырушысы» Оралхан Айдарханұлына, қазақ күресінен «Үздік балуаны» атағы Ерлхан Балтабайға бұйырды. Сондай-ақ, «Жомарт жүрек» марапаты Рүстембек Алишерге, «Жылдың үздік төрешісі» Бауыржан Абирике табыс етілді.

Сонымен қатар, Мақсат Рахмиев «Үздік комментатор» атанса, «Жылдың үздік ауданы» атағы Төлеби ауданына берілді. Ал «Жылдың үздік федерациясы» номинациясы – Қазығұрт ауданының көкпар федерациясының қанжығасына байланды.

Айта кетелік, өткен жылдың соңында Астанада тоғызшының рет өткен «Алтын тұғыр» салтанатты жиынында ел ішінде оза шауып, халықаралық жарыстарда бақ сынап, жеңіске жетіп жүрген спортшыларға арнайы мүсінше мен ақшалай сыйақы табыс-талған болатын. Олардың арасында Түркістан облысынан Ерлхан Айкөз «Үздік жамбы ату спортшысы», тоғызқұмалақтан әйелдер арасында Әсел Далиева үздік спортшы атанған болатын.



700 миллионнан астам адам қызығатын спорт

Шымкенттегі жеңіл атлетикалық манеж кешенінде GAMMA жауынгерлік аралас жекпе-жегінен жасөспірімдер, ересектер, әйелдер және ардагерлер арасында Шымкент қаласының ашық чемпионаты өтті. Жарысқа Қырғызстан және Алматы қаласы, Қызылорда, Түркістан, Жамбыл облысынан аралас жекпе-жек шеберлері қатысып, жалпы 300-ден астам спортшы бақ сынады.

Сайыстың ашылу рәсімінде қалалық дене шынықтыру және спорт басқармасы басшысының орынбасары Ермек Дәрменов, Шымкент қаласы прокурорының орынбасары Берген Ержаппар, қалалық GAMMA жауынгерлік аралас жекпе-жек федерациясының басшысы, прокуратура ардагері Асқар Тілеуұлы спортшыларға сәттілік тіледі. «Аталған спорт түрі Шымкент қаласында қарқынды дамып келеді. Былтыр Қырғызстанда өткен Азия чемпионатында қала спортшылары жеңімпаз болып оралды. Шаһарда 200-ден астам адам осы спортпен шұғылданады. Салауатты өмір салтын насихаттауға зор үлес қосып келеді», – деді Е.Дәрменов. Қалалық GAMMA жауынгерлік аралас жекпе-жек федерациясының басшысы Асқар Тілеуұлы жауынгерлік жекпе-жек түрі бұқаралық спортта дами беруіне тілектестігін білдірді. Қалада осы спорт түрінен Нұржан Бекзатов, Нұрлан Нұрсейітов сынды саңлақтар бар. GAMMA MMA жауынгерлік аралас жекпе-жек әмбебап спорт болғандықтан жұртшылық оны қызыға қарайтыны мәлім. «Мықты жауынгерлеріміз Қазақстанда жеткілікті, бұл спорт түріне қызығатын жастардың да қатары артып келеді. Ал, бүгінгі чемпионатта жерлестеріміз міндетті түрде жеңіске жететініне сеніміміз мол», – деді Арман Оспанов. Мамандардың айтуы бойынша, аралас жекпе-жектің басты ерекшелігі – бірнеше спорт түрінің бірігуі. Қазіргі таңда әлем бойынша бұл спорт түріне жеті жүз миллионнан астам адам қызығушылық танытады екен.

Бетті дайындаған
А. АЙДОСҚЫЗЫ

Хабарландыру

“ҚР ІІМ Қылмыстық-атқару жүйесі комитетінің “№69 мекеме” РММ-сі “ҚАЖК “№69 мекеме” РММ-не жасаған эмиссия нормативтері жобасы бойынша жария талқылау нысанында қоғамдық тыңдау өткізілетінін хабарлайды.

Жобалық құжаттама материалдары Бірыңғай экологиялық порталда <https://ecoportal.kz/> 02.02.2023 ж. бастап қол жетімді болады.

Ескертулер және ұсыныстар 5 жұмыс күні ішінде қабылданатын болады

Объявление

РГУ «Учреждение №69 комитета уголовно-исполнительной системы МВД РК» сообщает о проведении общественных слушаний в форме публичных обсуждений по проекту нормативов эмиссии для РГУ «Учреждения №69» КУИС МВД РК.

Проектная документация будет доступна на Едином экологическом портале <https://ecoportal.kz/> с 02.02.2023 г.

Замечание и предложения принимаются в течении 5 рабочих дней.